



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 7.5.2026

Nr: 27

Ora: 13:30

VENDIM
PËR

SHQYRTIMIN E KËRKESËS PËR PAJISJEN ME FLETË TIP PËR MBLEDHJEN E NËNSHKRIMEVE PËR ZHVILLIMIN E REFERENDUMIT TË PËRGJITHSHËM PËR SHFUQIZIMIN E LIGJIT NR. 55, DATË 28.05.2015 "PËR INVESTIMET STRATEGJIKE NË REPUBLIKËN E SHQIPËRISË"

Sot më datë 7.5.2026, Komisioneri Shtetëror i Zgjedhjeve mori në shqyrtim çështjen administrative me:

KËRKUES: Grupi Nismëtar për mbledhjen e nënshkrimeve për Referendum, i përbërë nga 12 anëtarë: z. Adriatik Lapaj, zj. Dorina Prethi, z. Elton Laska, zj. Edona Haklaj, zj. Agustella Thoma, z. Alfred Matoshi, z. Alban Afmeti, z. Erjon Selmani, zj. Sajmire Hoda, z. Albert Shkalla, zj. Melanika Lleshi, z. Erjon Bacaj.

OBJEKT: Kërkesë për miratimin e fillimit të procedurave për mbajtjen e referendumit për shfuqizimin e ligjit nr. 55, datë 28.05.2015 "Për investimet strategjike në Republikën e Shqipërisë".

BAZA LIGJORE: Neni 19, pikat 1, shkronjat "b" e "n", dhe 2, të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, neni 150, pika 1, i Kushtetutës së Republikës së Shqipërisë, si dhe nenet 126 e vijues të ligjit nr. 9087, datë 19.6.2003 "Kodi Zgjedhor i Republikës së Shqipërisë", të ndryshuar.

Në përfundim të këtij shqyrtimi,

K O N S T A T O J :

Grupi Nismëtar për Referendumin e Përgjithshëm, i përbërë nga 12 anëtarë: z. Adriatik Lapaj, zj. Dorina Prethi, z. Elton Laska, zj. Edona Haklaj, zj. Agustella Thoma, z. Alfred Matoshi, z. Alban Afmeti, z. Erjon Selmani, zj. Sajmire Hoda, z. Albert Shkalla, zj. Melanika Lleshi, z. Erjon Bacaj, shtetas shqiptarë me të drejtë vote, kanë paraqitur pranë Komisionit Qendror të Zgjedhjeve, kërkesën nr. 1013 prot., datë 29.4.2026, për fillimin e procedurave për zhvillimin e një referendumit të përgjithshëm për shfuqizimin e ligjit nr. 55, datë 28.05.2015 "Për investimet strategjike në Republikën e Shqipërisë".

Bashkëlidhur kërkesës, grupi nismëtar ka depozituar:

Data: 7.5.2026 Nr: 27
Ora: 13:30



"Për shqyrtimin e kërkesës për pajisjen me fletë tip për mbledhjen e nënshkrimeve për zhvillimin e referendumit të përgjithshëm për shfuqizimin e ligjit nr. 55, datë 28.05.2015 "Për investimet strategjike në Republikën e Shqipërisë"

- Procesverbal mbi krijimin e grupit nismëtar për mbledhjen e nënshkrimeve për referendum,
- Kopje të kartave të identitetit të grupit nismëtar.

Sipas kërkesës së paraqitur, ky referendum kërkohet të zhvillohet me qëllim që qytetarët shqiptarë të shprehin drejtpërdrejt vullnetin e tyre lidhur me ligjin nr. 55, datë 28.05.2015 “Për investimet strategjike në Republikën e Shqipërisë”. Ky ligj, nga sa referon në nenin 1 të tij, synon nxitjen dhe tërheqjen e investimeve strategjike, vendase dhe të huaja, në sektorë të ekonomisë, të identifikuar prej këtij ligji si sektorë strategjikë, nëpërmjet vendosjes së procedurave të posaçme administrative favorizuese, lehtësuese apo përshpejtuese të mbështetjes dhe të shërbimeve ndaj investorëve. Në nenin 2 të tij, ligji përcakton se objekti i tij është të përcaktojë procedurat dhe rregullat që zbatohen nga organet shtetërore për shqyrtimin, miratimin dhe mbështetjen e investimeve strategjike, vendase dhe të huaja, që realizohen në Republikën e Shqipërisë, si dhe shërbimet ndaj investorit.

Sipas nismëtarëve të referendumit, ky ligj në mënyrën si është hartuar nuk mund të prodhojë rezultate pozitive dhe cenon rëndë të drejtën e pronës së shtetasve shqiptarë. Ky ligj duhet të shfuqizohet dhe nuk mund të aplikohet në këtë mënyrë përpara se të zgjidhen ligjërish të përfundimisht çështja e njohjes, kthimit dhe kompensimit të pronës në Republikën e Shqipërisë.

Në vijim të argumentimit të tyre, nismëtarët theksojnë se Republikës së Shqipërisë i duhet një kuadër ligjor për mbrojtjen e investorëve të huaj apo vendas në rastet e investimeve të rëndësishme, por kjo nuk mund të bëhet në asnjë rast në ato prona që janë private apo që edhe pse rezultojnë në gjendjen juridike shtet, janë në procese gjyqësore dhe pretendohen nga palë private.

Në zbatim të nenit 127 të ligjit nr. 9087, datë 19.6.2003 “Kodi Zgjedhor i Republikës së Shqipërisë”, të ndryshuar, Komisioni Qendror i Zgjedhjeve, brenda 20 ditëve nga paraqitja e kërkesës për referendum të përgjithshëm, pajis grupin nismëtar kundrejt pagesës me fletët-tip për mbledhjen e nënshkrimeve të 50 mijë zgjedhësve të regjistruar në Regjistrin Kombëtar të Zgjedhësve në kohën e paraqitjes së kërkesës. Në krye të fletës tip shtypet titulli i ligjit, dispozitat që kërkohen të shfuqizohen ose çështja që shirohet në referendum.

Nënshkrimet në mbështetje të kërkesës për zhvillim të referendumit të përgjithshëm depozitohen në KQZ në periudhën nga 1 janari deri më 30 nëntor të çdo viti.

Komisioni Qendror i Zgjedhjeve, bazuar në nenin 126, pika 2, të ligjit nr. 9087, datë 19.06.2003, përpara shqyrtimit të kërkesës së paraqitur, përmbushi detyrimin ligjor për verifikimin nëse anëtarët e grupit nismëtar për zhvillimin e referendumit, figurojnë zgjedhës të regjistruar në Listën e Zgjedhësve. Konfirmohet se 12 shtetasit që figurojnë në listën e grupit nismëtar, janë të regjistruar në listën e zgjedhësve, fakt i cili përmbush kriterin e përcaktuar në nenin 126, pika 2, dhe KQZ mund të procedojë më tej me shqyrtimin e kërkesës së paraqitur.

Kërkesa e grupit nismëtar për zhvillimin e referendumit të përgjithshëm për shfuqizimin e ligjit nr. 55, datë 28.05.2015 “Për investimet strategjike në Republikën e Shqipërisë”, përmbush kushtet e parashikuara në nenin 126 të ligjit nr. 9087, datë 19.6.2003, “Kodi Zgjedhor i Republikës së Shqipërisë”, të ndryshuar. Grupi nismëtar është i përbërë nga numri i kërkuar ligjor i shtetasve shqiptarë me të drejtë vote, të regjistruar në listën e zgjedhësve, dhe kërkesa është shoqëruar me dokumentacionin e nevojshëm sipas legjislacionit në fuqi.

Për rrjedhojë, vlerësohet se janë përmbushur kriteret ligjore për vijimin e procedurës referendare dhe, në zbatim të dispozitave përkatëse të Kodit Zgjedhor, procedon me hapat e mëtejshëm për pajisjen e grupit nismëtar me fletët-tip për mbledhjen e nënshkrimeve të zgjedhësve, në përputhje me afatet dhe rregullat e përcaktuara nga ligji.

PËR KËTO ARSYE:

Në mbështetje të nenit 19, pikat 1, shkronjat “b” e “n”, dhe 2, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, nenit 150, pika 1, të Kushtetutës së Republikës së Shqipërisë, si dhe nenet 126 e vijues të ligjit nr. 9087, datë 19.6.2003 “Kodi Zgjedhor i Republikës së Shqipërisë”, të ndryshuar,

V E N D O S:

1. Miratimin e fletës tip për mbledhjen e nënshkrimeve për zhvillimin e referendumit të përgjithshëm për shfuqizimin e ligjit nr. 55, datë 28.05.2015 “Për investimet strategjike në Republikën e Shqipërisë”, sipas lidhjes që i bashkëlidhet këtij vendimi.
2. Afati për mbledhjen e nënshkrimeve është 8 muaj nga data e shpalljes së këtij vendimi. Në llogaritjen e këtij afati nuk përfshihet periudha 1-31 dhjetor 2026.
3. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
4. Kundër këtij vendimi mund të bëhet ankim në Komisionin e Ankimeve dhe Sansioneve, brenda 30 (tridhjetë) ditëve nga shpallja e tij.

Komisioneri Shtetëror i Zgjedhjeve

Ilirjan CELIBASHI



Nr. Prot 1128
Dt 8.5.2026

Data: 7.5.2026 Nr: 27
Ora: 13:30



“Për shqyrtimin e kërkesës për pajisjen me fletë tip për mbledhjen e nënshkrimeve për zhvillimin e referendumit të përgjithshëm për shfuqizimin e ligjit nr. 55, datë 28.05.2015 “Për investimet strategjike në Republikën e Shqipërisë”